



**Les Fleurs Des Vies Des Saints Et Des Festes De Toute
L'Annee, Svivant L'Vsage Dv Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromee, & de Sainte Françoise ; Avec le Mertyrologe Romain, pour
tous les iours de l'Annee ...

Ribadeneyra, Pedro de

Paris, 1631

vii La vie de sainte Osite, vierge & mart.

[urn:nbn:de:hbz:466:1-75777](https://nbn-resolving.org/urn:nbn:de:hbz:466:1-75777)

quelle saint Caprais ayant prins courage, souffrit
 ritement le martyre. Item sainte Erotide, laquelle bruslant de
 l'amour de Dieu, surmonta l'ardeur du feu, dans lequel on l'a-
 voit tectee. A Treves se fait la commemoration d'un nombre pres-
 que infiny de saints martyrs, lesquels durant la persecution de
 Diocletian, sous le President Ricouare, furent en diuerses facons
 mis à mort pour la Foy de nostre Sauueur. A Auxerre deceda saint
 Roman Euesque & Confesseur. A Odeze ville de la Seigneurie
 de Venise saint Magne Euesque, le corps duquel repose à Venise
 en l'Eglise de saint Ieremie. En Calabre saint Bruno Confesseur
 qui fonda l'Ordre des Peres Chartreux. A Rome sainte Balbine
 vierge.

LA VIE DE SAINCTE
 Osite Vierge & Martyre.

Sainte Osite estoit Angloise
 de nation, fille du Roy Frite-
 uaud, & d'Vlteberg, qui
 estoit fils de Perida Roy des
 Marches: elle s'addonna dès
 son enfance à la modestie,
 honnesteté, & autres ceures
 de vertu: il y auoit lors deux grandes Dames &
 saintes Vierges en Angleterre, Moduene Ab-
 besse d'un Monastere où il y auoit quantité de
 bonnes Religieuses, & Edite sœur du Roy Al-
 fred, qui fut aussi mere & maistrisse de plusieurs
 filles elloignées de la conuersation mondaine:
 Osite fut baillé à sainte Moduene pour l'in-
 struire, & elle l'enuoya à Edite, pensant qu'elle
 seroit mieux entre ses mains.

Aduint qu'un iour Edite enuoya Osite porter
 un liure à Moduene, elle passa sur un pôt de bois
 par un grand vent, qui l'emporta dans la riuere,
 & le courant de l'eau l'emmena si loing, qu'elle fut
 noyée: trois iours de là Moduene estât en orai-
 son, un Ange s'apparut à elle, qui luy dit, qu'elle
 courust vistemēt à la riuere, où elle trouua sain-
 te Edite qui cherchoit Osite, d'autāt qu'elle ne
 estoit point reuenue au logis depuis qu'elle l'auoit
 enuoyée porter ce liure: on leur dit qu'Osite s'e-
 stoit noyée, alors elles prierent nostre Seigneur
 de la leur redre, & retirerree du profod de ce fleu-
 ue: ayāt acheué leur oraison, Moduene l'appel-
 la trois fois d'une voix claire & argentine, disant,
 Osite, Osite, Osite, au nom de la tres-sainte Tri-
 nité, lors de la riuere, Osite respondit: me voycy
 ma maistrisse, me voycy, me voycy, & sortit de
 l'eau avec son liure en la main, sans auoir aucun
 mal. Sainte Moduene deceda, & Osite retour-
 na chez ses parens, où elle se rendit de iour en
 iour plus honeste & vertueuse. Estant paruenue
 en aage nubile, Siger Roy de la Saxe Orientale,
 la demanda à ses parens en mariage, & quoy qu'elle
 y repugnast ayant desir de garder sa virginité,
 ils la poullierēt quasi à force. Le iour des no-
 pees estant venu, & le Royal appareil tout prest,
 la sainte Vierge se recōmandoit à Dieu avec des
 gemissemens & profonds souspirs, le suppliāt de
 cōseruer le precieux ioyau de sa chasteté, lequel
 elle tascha depuis par diuerses excuses & pretextes
 de maladies, de maintenir sans cōsommer le
 mariage, iusques à ce qu'un iour le Roy l'appella
 & la fit entrer en son cabinet, pour iouyr de son

extrême beauté qu'il aimoit si esperduemēt, cho-
 se qu'elle abhorroit du tout: mais il furint à l'in-
 stant un grand bruit dans le Palais royal, à cause
 d'un cerf d'une hauteur demesurée, qui s'estoit
 presenté à la porte: le Roy laissāt la Royne Osite
 sans luy toucher, alla voir le cerf, & l'ayāt confi-
 deré, il resolut de mettre ses veneurs après, ius-
 qu'à ce qu'ils l'eussent pris. Osite eschappa ainsi
 ce hazard, remerciant nostre Seigneur I.C. qui
 l'auoit deliuree par ce moyen, & de peur de tom-
 ber en un pareil incōuenient, elle appella de bōs
 Religieux, auxquels elle declara son intētion, &
 ils luy couperent les cheueux, luy donnās l'habit
 de Religion avec le voile, & la sacrant religieu-
 se. A quelques iours de là le Roy retourna de la
 chasse, & trouua sa femme habillé en Religieu-
 se, qui auoit fait veu de chasteté, & pris Ies. Ch.
 pour son Espoux, combien qu'il y eust grand re-
 gret, neātmoins il ne la voulut pas forcer, ny de-
 tourner de ceste sainte resolution; au cōtraire,
 il luy fit bastir un logis tout exprēs pour viure
 religieusement, & luy donna du reuenue de quoy
 s'ētreenir. Aussi tost que cela fut seue, plusieurs
 Damoiselles desirerent d'accompagner & seruir
 sainte Osite: elle en receut quelques-vnes, auf-
 quelles elle apprit la perfection par son exēple:
 car sa vie estoit fort austere, taciturne, penitēte,
 & fort addonnée à l'oraison, c'estoit plustost un
 pourtrait du ciel, que la vie d'une femme char-
 nelle & fragile. Neātmoins la sainte Vierge qui
 reluisoit en vertu & rescolation, obtint par la
 permission diuine, deux couronnes de Vierge &
 de Martyr, parce que des Corsaires de Danne-
 mare, nation farouche & barbare, descendirent
 à la coste d'Angleterre où estoit Osite, mettant
 tout à feu & à sang, ils entrerent dans le Mona-
 stere où elle demouroit, & l'enleuerent: le Capi-
 taine de ces Pirates scachant qui elle estoit, luy
 voulut persuader par flatteries, promesses &
 menaces d'adorer leurs faux dieux, & renier nos-
 tre Seigneur Iesus-Christ: mais la trouuant
 constante en l'amour & confession de son cher
 Espoux, il luy fit trancher la teste. Il arriua lors
 une chose que ie ne veux pas obmettre, le chef
 de la sainte Vierge tombant par terre, le corps
 se releua prenant la teste avec les mains qu'il
 porta tout droit à l'Eglise des Apostres saint
 Pierre & saint Paul, près de quatre cens pas de
 là. Il trouua la porte de l'Eglise fermee, il frap-
 pa contre avec ses mains sanglantes, puis tomba
 à terre, y laissāt les marques de son sang. Au lieu
 où elle fut decapitee, sourdit une fontaine d'eau
 viue & claire, qui guarissoit plusieurs malades.
 Ses parens mirent son corps saint dans un cer-
 cueil de plomb, dans l'Eglise d'Aislesbert fort
 honorablemēt, où nostre Seigneur fit beaucoup
 de miracles. Il demeura là iusques à ce que la
 sainte Vierge s'apparut à un homme, & luy
 commanda d'emporter son corps qui estoit dans
 ce cercueil de plomb, à l'Eglise de Chichent, où
 elle auoit vescu & endure le martyre: qu'il ne
 craignit pas, d'autant qu'elle luy ayderoit à
 ceste entreprise. Cct homme luy obeyt; & ap-
 porta les Reliques de la sainte Vierge où elle
 Ce

uoit commandé, & Maurice Euesque de Londres les receut, & colloqua reueremment: l'Euesque de Rosense, qui estoit lors presët, & fort malade, fut aussi tost guaruy.

Des Matelots prirent vn morceau de marbre du portail de l'Eglise de sainte Osite, qu'ils porterent dans leur barque pour l'enleuer secretement, mais le vaisseau demeura immobile, iusques à ce que les Mariniers recogneurent leur faute, & rendirent à l'Eglise le marbre qu'ils en auoient osté. Vn Prestre fit vœu au Monastere de sainte Osite de se rendre Religieux, il fut negligët d'accomplir sa promesse, il tomba malade, & estant à l'agonie de la mort, il implora la faueur de la sainte Vierge, laquelle s'apparut à luy, l'accusant d'ingratitude, & d'auoir manqué à sa parole: il luy promit derechef de s'amender, & qu'il se feroit Moine. La sainte Vierge luy dist: l'ay pitié de toy, si tu l'as aussi de toy-mesme, & que tu vueilles seruir à Dieu, quoy que bien tard: elle le toucha, & il fut aussi tost guaruy: il se fit Religieux, & s'en acquitta si bien qu'on le mit Prieur du Couuent de saint Barthelemy de Londres. Elle guarit vne femme contrefaite & courbée, qui ne se pouuoit dresser: Elle fit parler & ouyr vn enfant muet & sourd, elle guarit les bras d'une ieune Damoiselle, qui n'eust sceu s'en ayder: celle-là ayant fait vœu de chasteté se maria, puis apres sainte Osite s'apparut à elle, & la reprint de ce peché d'un regard feuerre, luy liant inuisiblement les pieds, de telle sorte qu'elle ne le pouuoit remuer, iusqu'à ce qu'elle eut obtenu pardon de nostre Seigneur à force de larmes, & l'usage libre de ses pieds, par l'intercession de la sainte Vierge. S. Edmond Archeuesque de Cantorbie apparut à vn autre qui auoit demeuré plusieurs années sans marcher, & luy commanda d'aller à l'Eglise de sainte Osite, où elle recouureroit sa santé tant desirée, comme elle fit. Sa vie a esté eserite par Alberic Verer, regulier. Surius la met en son 5. Tome le 7 d'Octobre: les Auteurs de l'Histoire d'Angleterre font mention d'elle, & le Martyrologe Romain le 16. de Septembre de sainte Edite, qui fut maistresse de saint Osite, ainsi que nous auons dit. Le Cardinal Baronius remarque en ses annotations, qu'elle florissoit l'an de nostre Seigneur 680. Raoul parle aussi d'elle, liu. 6. chapit. 7. in Policron.

LA VIE DE SAINT MARC Pape, & Confesseur.

MAr la mort du saint Pape Syluestre, on esleut en sa place saint Marc, natif de Rome, fils de Prisque, qui estoit doué de grandes vertus, & encore qu'il ne dura pas long-temps, pendant la paix dont iouysoit l'Eglise, par la faueur de l'Empereur Constantin, il eut moyen de s'opposer aux Arriens qui se multiplioient fort, & d'establi tout ce qui luy sembla necessaire pour vn bon gouvernement. Saint

Marc fit bastir deux Eglises, l'une en la voye Ardeatine, à vne lieuë de Rome, & l'autre dans la ville, qui est dediée sous son nom; il les dota de riches possessions & heritages, les enrichit d'ornemens & vaisseaux d'or & d'argent. Il permit à l'Euesque d'Ostie d'vser du *Palium*, à cause de l'ancien priuilege qu'il a de consacrer le Pape.

Il ne fut Pape que huit mois, selon S. Hierosme. Le Cardinal Baronius dit, qu'il parut au Siege Apostolique le 14. de Feurier, & qu'il mourut le 7. d'Octobre, qui sont huit mois & iours moins, il fut enterré au Cimetiere de Balbine, en l'Eglise qu'il auoit fait bastir en la voye Ardeatine. Il deceda le 7. d'Octobre, auquel iour l'Eglise celebre sa feste l'an 336. sous l'Empire du grand Constantin. Ceux qui ont eserit les vies des Papes font mention de saint Marc, & les quatre Martyrologes.

LA VIE DES SAINCTS Serge & Bach, Martyrs.



SE signalé martyre de saint Serge & saint Bach, a esté deserit par Simeon Metaphraste, duquel nous l'auons tiré succinctement. Serge & Bach estoient cheualiers Romains, & des principaux domestiques de l'Empereur Maximian, car Serge estoit Prinicier, c'est à dire, le premier Secretaire d'Etat, qui estoit l'une des premieres dignitez, laquelle ne se donnoit qu'apres plusieurs longs & agreables seruices: Bach estoit le second Secretaire des comandemens: & outre leur rang, l'Empereur ignorant qu'ils fussent Chrestiens, les ayuoit & honoroit à cause de leurs vertus: mais si tost qu'il fust aduertuy, pour en scauoir la verité, estant lors en la province interieure de Syrie, nommée Eufrafie en la ville d'Auguste, il les fit appeller pour l'accompagner au Temple, où il alloit sacrifier à ses Dieux, ils le suivirent iusques à la porte du Temple, & demurerent dehors. Maximian, ne les apperceuât point lors du sacrifice, les fit chercher: on les trouua en prietes à la porte du Temple: l'Empereur leur demanda pourquoy ils n'estoient pas venus sacrifier avec luy au grad Iupiter: Ils responderent franchement, parce qu'ils estoient Chrestiens: & qu'on ne doit sacrifier qu'à Dieu seul, Createur du ciel & de la terre. Maximian comanda lors qu'on leur ostast leurs coliers d'or, & leurs riches habits, & qu'on les habillast en femmes, pour les traîner ignominieusement par toutes les rues de la ville, liez & enchaifnez, & puis qu'on les menast en prison.

L'Empereur les voulust tenter, tantost par promesses & flatteries, tantost par menaces & estonnemens, pour les ranger à sa volonté, & les persuader de demeurer en la Religion de leurs ancestres, sacrifiants aux dieux, qui estoient fondateurs & conseruateurs de leur Empire. Voyant que la force, ny la ruse, ny toutes les machines de l'Empereur ne pouuoient faire breche dans ces cœurs inexpugnables des saints Martyrs, il resolut de les enuoyer à Antiochus